

unArt | Basel

Nimmsch dä Zeedel, so ka's passiere,
as di d'Schmiir grad duet yykassiere;
letscht Johr sin au scho in hohem Booge,
gweenligi Passante in Wooghof gflooge,
well dr Kommandant het welle brilliere,
gseit het: «Do muess me nid studiere;
das Pagg verhafte, s'isch kai Schand,
macht nur Schissdrägg ohni Verstand.»

Studänte wänn nid d'Ärm verschrängge,
sondern e Performance, im Gedängge
ans 2013, wo – was gar nid goot –
mit Dräänegas und Gummischroot,
d'Schmiir het saubleed Lyt vertriibe,
wo friidlig fiire, eifach hogge bliibe,
uff em Mässeplatz während dr Art,
trotz riese Polizeiuffgebot am Start.

Unbewilligti Demos, Saubannerzug im Mai...
maint dr Baschi Dürr: «Dasch mr ainerlai!
Aber während dr Art Basel derf nyt passiere,
verstand nyt vo Kunscht, wott niemer brüskiere;
e Kinschtlerperformance, was soll das syy?
Kunscht soll me kaufe und bringt öppis yy.»
Bi so viele VIPs will är sich nid blamiere,
drum duet er lieber ebitz überreagiere.

Dr Polizeichef fühlt sich au grad provoziert,
schiggt Schugger los, mecht das eliminiert.
Und wie Gorillas stürme sy denn los,
e bitzeli Action, das isch doch famos.

Wie bim Favelakaffi friidlig proteschtiere,
das goht doch nid, sott nümm passiere.

Drum wird jetz grad im Kaim erstiggt,
sobald s'Glainschte im Aasatz nur erbliggt.
«Wenn irgend sone Aktion duet starte»,
sait dr Baschi Dürr «diend nymmi warte!»

So wärde d'Studänte denne kurzerhand,
zämme mit de Passante am Strooserand,
wo si öbbis Verdächtigs gänn, nundefaane,
grad sofort verhaftet, wo fiehrt das aane?!
Und die gföhlrige Pappdäller konfisziert,
fotografiert und denn im Tresor archiviert.

Schnappsch schnäll dä Flyer, luegsch no drii,
es könnt doch e Guetschyyn für e Cüpli sii.
Aber wägem Zeedel in dr Hand – wär ka's verstoh? –
wirdsch im Kaschtewaage uff e Wooghof gnoh!
«Y sett no Medikamänt näh», losch se wisse,
und au d'Frau wurd di bim z'Nacht vermissee.

Die macht sich Sorge, lyttet de Schugger aa,
sälli meine schnäll: «Jä; das isch ihre Maa?
Dä muess sich zerscht no füdleblutt abzieh,
mien en durchsueche, es macht ys kai Mieh;
me weiss nie wo die Chaibe ums'verregge,
amme die Flyer no richtig fies dien verstege.»

Drum syyg sehr vorsichtig und heb Verstand,
es ka alles passiere, mit eme Zeedel in dr Hand!



www.rootsheere.ch

Wotsch bi uns mitmache!
Denn kumm doch ans
Yschriebe, am Samschtig,
7. und 14. Merze, vom Zwei bis am
Vieri am Nomidaag in unserem Käller
(Hebelstroos 11a). Mir freye-n-is uf di!

Am Frytig und Samschtig,
27. und 28. Hornig (Februar),
isch Noochwuggswärbig
vo dr 1. Lektion im Zält uff em Barfi.
Wotsch emol probiere pfyffe oder drummler?
Denn kumm verby, mr zeiges dr gärn!

Di Ladänte-Uusstellig uff em Minschterplatz und d'Waage- und Reggwisye-Uusstellig bi dr Käseme sin vom Mäitig zuecht bis am Mitwuchdemoel.